

列朝詩集

丙集第九

唐解元寅 七十五首

覽張靈 二首

祝京兆允明 一百三十九首

覽夢蘇道人 六首

徐博士禎卿 一百二十三首

都太僕穆 三首

邢處士參 六首

朱處士存理 五首

朱處士凱 三首

劉秀才嘉縉 二首

唐解元寅

寅字伯虎一字子畏吳縣吳趨里人童髻入鄉學才氣奔放與所善張靈
夢晉縱酒放懷諸生或施易之慨然曰閉戶經年取解首如反掌耳弘治
戊午舉鄉試第一洗馬梁儲主南試還朝携其文示程詹事敏政相與歎
息曰一解首不足重唐生也遂因洗馬召致伯虎往還門下儲奉使南行
伯虎乞敏政文以餞已未會試敏政為考官同舍舉子關通考官家人事
延伯虎詔獄掠問無狀竟坐乞文事論發為吏寧庶人招致天下名士以
厚幣聘伯虎察其有異志佯狂使酒露其醜穢庶人不能堪乃放歸築室

列朝詩集行

桃花場與客般飲其中年五十四而卒伯虎不治生產既免歸緣故去其妻每自恨放廢無所建立譬諸梧枝旅霜苟延奚爲復感激曰丈夫雖不成名要當慷慨何迺效楚囚家無儋石客嘗滿座文章風采照曜江表圖其石曰江南第一風流才子歸心佛氏取四句偈自號六如外雖頽放中實沈玄人莫得而知也少嘗乞夢九鯉仙夢贈墨一擔自是才思益進其學務窮研造化尋究律歷求揚馬玄虛邵氏聲音之理而贊訂之傍及風鳥壬遁太乙出入夫人之間晚將成一家言未竟而歿其於應世詩文不甚措意謂後世知不在是見我一斑已矣奇趣時發或寄於畫下筆輒追唐宋名匠亦不盡其所至祝希哲有言氣化英靈大略數百歲一發鍾於人子良得之一旦已矣此其痛宜如何置知伯虎者其唯希哲乎伯虎詩少喜穢麗學初唐長好劉白多悽怨之詞晚益自放不計工拙與寄爛熳時復斐然蘇臺袁褰輯伯虎詩僅存其少作而顧華玉以爲絕詣在是此固未知伯虎抑豈可謂知詩也哉

短歌行

尊酒前陳欲舉不能感念疇昔氣結心冤日月悠悠我生告道民言無欺

秉燭夜遊昏期在房蟋蟀登堂伏絲比簀庶未憂傷憂來如絲紛不可治
綸山布谷欲出無岐頰頰若穴熒熒莫絕無言不疾鼠思泣血霜落飄飄
雅栖無巢毛羽單薄雌伏雄號綠子素纓灑掃中庭躑躑躅仰見華星
來日苦少去日苦多民生安樂焉知其他

相逢行

相逢狹邪間車窒馬不旋雖言異鄉縣豈非往世緣脫鞞且卷鞭高揖問
君屢女弟新承寵阿大李延年何以結歡愛渠盃出于闕女蘿與青松本
自當纏綿

出塞

烽火照玄菟嫖姚召僕夫朱家薦逋虜刀間出黠奴六郡良家子三輔弛
刑徒笳度烏啼曲旗參虎落圖寶刀裝鞞奉名駒被鏤渠縱金出孤竹飛
旌掩二榆妖雲壓亡塞珥月照窮胡勒兵收日逐潛軍執骨都姑衍山重
禪燕然石再刻功成肆郊廟雄郡却分符

俠客

俠客重功名西北請專征慣戰弓刀捷酬知性命輕孟公好驚座郭解始

友真詩集卷之六
橫行相將李都尉一夜出平城

隴頭水

隴水分四注隴樹雜雲烟磨刀共斂甲飲馬並投錢朔地風初合交河水
復堅寒際不能語易孫掠酒泉

咏春江花月夜

麝月重輪三五夜玉人聯粲出靈娥內家近製橫汾曲樂府新諧役鄧歌
十里花香通綵殿萬枝燈焰照春波不關仙容饒芳思晝短歡長奈樂何

春江花月夜二首

嘉樹鬱婆娑燈光月色和春江流粉氣夜水濕裙羅
夜霧沈花樹春江溢月輪驩來意不持樂極詞難陳

登吳王郊臺作

昔人築此不論程今日牛羊向上行吳兒越女齊聲唱菱葉荷花無數生
南山含雨眉俱潤西湖映日掌同平本由萬感銷非易詎言哀樂過羣情

贈昌國以下集外詩

書籍不如錢一囊少年何苦擅文章十年掩翳青衫敝八口啼饑白稻荒

草閣纒經冰滿硯布衾棲夢月登牀三千好獻東方廣來伴山人讚法王

和石田先生落花詩二十首

今朝春比昨朝春北阮番成南阮貧借問牧童應沒酒試嘗梅子又生仁
六如偈送錢塘妾八斗才逢洛水神多少好花空落盡不曾遇着賞花人
夕陽芳草笛悠悠春事驚看又轉頭浙瀝風光搖草樹驂驛時節逐川流
臨階忍數脂千片遶樹空煩繡半鈎九十繁華梭脫手多情又作一番愁
恐把殘紅掃作堆紛紛雨裏毀垣頽蛤蚧上市驚新味鷓鴣催人再洗杯
肯唱驪歌送春去悔教羯鼓徹明催爛開賺我平添老知到年來可爛開
芒鞋布襪罷春游粉蝶黃蜂各自愁傍老光陰情轉切惜花心性死方休
膠黏日月無長策酒對茶糜有近憂一曲山香春寂寂碧雲莫合隔紅樓
整燕還巢未定時村翁散社醉扶兒紛紛花事成無賴默默春心怨所私
雙臉胭脂開北地五更風雨葬西施匡林自拂眠清晝一縷茶烟鬢髮絲
春盡愁中與病中花枝遭雨又遭風鬢邊舊白添新白樹底深紅換淺紅
漏刻已隨香篆了錢囊甘爲酒柸空向來行樂東城畔青草池塘亂落東
崔徽自寫鏡中真洛水誰傳賦裏神節序推移比彈指鉛華狼籍又辭春

紅顏仙蛻三生骨。紫陌香消一丈塵。遶樹百回心語口。明年勾管是何人。
簇簇雙攢出。覩眉淹淹獨倚曲闌時。千年青塚空埋怨。重到玄都只賦詩。
瓦甃酒香燒柿葉。畫梁燈暗落塵絲。尋芳了卻今年債。又見成陰子滿枝。
天涯掩溘碧雲橫。春社園林紫燕輕。桃葉參差誰問渡。杏花零落憶題名。
日高蘇雜蝸黏壁。雨過鶯啼葉滿城。邀得大堤諸女伴。踏歌何處和盈盈。
節當寒食半陰晴。花與蜂游共死生。白日急隨流水去。青鞋空作踏莎行。
收燈院落雙棲燕。細雨樓臺獨啣鶯。休向東風訴恩怨。自來春夢不分明。
紅塵拂面望春門。綠艸齊腰金谷園。雀篆遍書苔滿砌。犬聲遙在月明村。
春風院院深籠鎖。細雨紛紛欲斷魂。拾得殘紅忍拋却。阿咸頭上伴銀旛。
春來赫赫去匆匆。刺眼繁華轉眼空。杏子單衫初脫暖。梨花深院自多風。
燒燈坐盡千金夜。對酒空思一點紅。倘是東君問魚雁。心情說在雨聲中。
舊酒新題滿袖痕。憐香惜玉竟難存。鏡中紅粉春風面。燭下銀屏夜雨軒。
奔月已滌丹換骨。墜樓端把死酬恩。長洲日莫生芳艸。消盡江淹黯黯魂。
花落花開總屬春。開時休羨落時嗔。好知青草骷髏塚。就是紅樓掩面人。
山屐已教休泛蠟。柴車從此不須巾。仙塵佛劫同歸盡。墜處何須論廁茵。

亞字城邊麋鹿臺，春深情況轉悠哉。
鬢衣玉貌乘風去，對酒蓬窗帶雨推。
結子桃花如雨落，挾雌蝴蝶過牆來。
江南多少閑庭館，朱戶依然鎖綠苔。
桃蹊李徑謝春榮，斗酒芳心與夜爭。
陌上新楊麴塵暗，墻頭圓月玉盤傾。
青帘巷陌無行跡，繡褶腰肢覺瘦生。
真道無情何必爾，自緣我輩正鍾情。
惻惻悽悽憂自擊，花枝零落鬢絲添。
迴遮燕語春三月，蕩漾波紋日半簾。
病酒不堪朝轉劇，聽風且喜晚來恬。
綠楊影裏蒼苔上，爲惜殘紅手自拈。
楊柳樓頭月半規，笙歌院裏夜深時。
花枝的的難長好，漏水丁丁不肯遲。
金串袖籠新藕滑，翠眉奩映小蛾垂。
風情多少愁多少，百結愁腸說與誰。
桃花淨盡杏花空，開落年年約略同。
自是節臨三月莫，何須人恨五更風。
撲櫺直破簾衣碧，上砌如欺地錦紅。
拾向砑羅方帕裏，鴛鴦一對共當中。
春夢三更雁影邊，香泥一尺馬蹄前。
難將灰酒灌新愛，只有香囊報可憐。
深院料應花似霰，長門愁鎖日如年。
憑誰對却閑桃李，說與悲歡石上緣。

席上答王履吉

我觀古昔之英雄，慷慨然諾杯酒中。
義重生輕死知己，所以與人成大功。
我觀今日之才彥，交不以心惟以面。
面前斟酒酒未寒，面未變時心已變。

區區已作老村庄，英雄才彥不敢當。但恨今人不如古，高歌伐木天滄浪。
感君稱我爲奇士，又言天下無相似。庸庸碌碌我何奇，有酒與君斟酌之。

漫興十首

十載鉛華夢一場，都將心事付滄浪。內園歌舞黃金盡，南國飄零白髮長。
髀裏肉生悲老大，斗間星暗誤文章。不才剩得腰堪把，病對緋桃檢藥方。
此生甘分老吳閭，萬卷圖書一草堂。秋榜才名標第一，春風絃管醉千場。
跣趺說法蒲團軟，鞋襪尋芳杏酪香。只此便爲吾事了，孔明何必起南陽。
一身憔悴掛衣襟，半壁藤林倚樹林。去日苦多休檢曆，知音諒少莫修琴。
平康驢背馱殘醉，穀雨花欄費朗吟。老向酒杯暮局畔，此生甘分不甘心。
偃偃暗數少時年，陳跡關心自可憐。杜曲梨花盃上雪，灞陵芳草夢中烟。
前程兩袖黃金淚，公案三生白骨禪。老後思量應不悔，衲衣持鉢院門前。
伯虎少作悵悵詞，與此首同。首聯之下，有何處逢春不悵悵，何處逢春不

可憐二句

馳驅京國繼頭塵，襤褸衣衫墊角巾。萬點落花俱是恨，滿杯明月卽忘貧。
香燈不起維摩疾，櫻笋難酬穀雨春。鏡裏自看成老大，戲兒棚上下場人。

平康巷陌倦遊人，狼籍桃花病酒身。短夢風烟千里笛，多情絃索一牀塵。
黃金誰買長門賦，黛筆空描滿額顰。惟有所歡知此意，共燒高燭賞餘春。
落魄迂疎自可憐，棋爲日月酒爲年。蘇秦捫頰猶存舌，趙壹傾囊已沒錢。
滿腹有文難罵鬼，措身無地反憂天。多愁多感多傷壽，且酌淡杯看月圓。
擁鼻行吟水上樓，不堪重數少年游。四更中酒半牀病，三月傷春滿鏡愁。
白面書生期馬革，黃金遊客勝貂裘。近來檢校行藏處，飛葉僧房細雨舟。
謝遣歌兒解臂鷹，半瓢詩稿一枝藤。難尋萱草酬知己，且摘蓮花供聖僧。
時事百年蝸角戰，酒杯三月鳳頭燈。盡嘗世味猶存舌，茶薺隨緣敢愛憎。
造物何曾苦忌名，太平端合老無能。親知散去綈袍冷，風雪欺貧瓦罐冰。
二頃未謀田負郭，一餐隨分欲依僧。醉時還倩家人道，消盡英雄氣未曾。

題畫

鞋襪東城路，清和四月時。游姬香滿袖，明月水平池。畫燭留錫市，酸風颭酒旗。少年行樂地，不許衆人知。

江南送春

細雨簾櫳復送春，倦游肌骨對愁人。一番櫻筍江南節，九十光陰鏡裏塵。

夜與琴心爭蜜燭酒和香篆送花神東君類我皆行客萍水相逢又一巡

題畫

湖上仙山隔渺茫世塵不上渡頭航白蘋開處藏漁市紅葉中間放鹿場
落日沈沙曾有影新霜着樹橘生香遙聞逋老經行處芝草歲蕤滿路傍

題芭蕉仕女

獸額朱扉小院深綠牕含霧靜悒悒有人獨對芭蕉坐因爲春愁不放心

送陳憲章

僧房酌酒送君行把臂西風無限情此際若爲銷別恨兩行紅粉轉春鶯

馬

艸軟沙平桃李開春風先到李陵臺雪中一陣烏鴉起知是胡雛打獵來

春日寫懷

新春踪跡轉飄蓬多在鶯花野寺中昨日醉連今日醉試燈風接落燈風
苦拈險韻邀僧和煖簇薰籠與妓烘寄問社中諸好友心情可與我相同

言懷二首

田衣稻衲了終身彈指流年已四旬善亦嬾爲何況惡富非所望莫憂貧

山房一局金勝着野店三栢石凍春但願今生只如此無榮無辱太平人
年來避世縮如龜淨掃茅茨閉竹籬日無繩那得住待天倚杵是何時
隨斟冷煖開懷酒懶算輸贏信手棋千古英雄一坏土不如歡笑有便宜
無題

紅粉啼粧對鏡臺春心一片轉悠哉若爲坐看花枝盡便是傷多酒莫推
無藥可醫鬱舌老有香難返夢魂來江南多少閒庭館依舊朱門鎖綠苔
冬日睡起

白木栖林厚疊氈身綾被緊摠肩無燈不做瞞心夢有酒何愁縮脚眠
渺渺邯鄲塵滿路遶遶蝴蝶絮漫天要知此段安身法是我新參沒眼禪
散步

吳王城裏柳成畦齊女門前水拍堤賣酒當爐人袅娜落花流水路東西
平頭衣襪和鞋試弄舌鈎鞦繞樹啼此是吾生行樂處若爲詩句不留題
題畫十八首

青藜拄杖尋詩處多在平橋綠樹中紅葉沒鞋人不到野棠花落一谿風
獨木橋邊倚樹根古藤陰裏嘯王孫白雲紅樹知多少雞犬人家自一邨

楊柳陰濃夏日遲
却邊高館漫平地
鄰翁竿盒乘清早
來決輸贏昨日棋
雪滿梁園飛鳥稀
煖煨榑柁閉柴扉
地爐溫却松花酒
剛是溪頭拾蟹歸
黃葉山家曉會琴
斜橋流水路陰陰
東西南北難豚社
氣象粗疎有古心
紅樹中間飛白雲
黃茅檻底界斜曛
此中大有逍遙處
難說於君画與君
頭如蒜顆眼如椒
雄逐雌飛向葦蕭
莫趁蟾螂失巢穴
有人拈彈不相饒

寒雀在耳梅

酒貨長苦欠經營
預給餐錢費水衡
多少如花後屏女
燒金時倩耿先生
一宿因緣逆旅中
短詞聊以託泥鴻
當時我做陶承旨
何必尊前面發紅

陶較

善和坊裏李端端
信是能行白牡丹
誰信揚州金滿市
元來花價屬窮酸

張社

草廬三顧屈英雄
伉慨南陽起臥龍
鼎足未安星又隕
陣圖留與浪濤春

三顧草廬

琴心挑取卓王孫
賣酒臨邛石凍春
狗監猶能薦才子
當時宰相是閒人

相如滌器

冰雪風雲事不同，今朝尊貴昨窮窮。
時多少英雄伴，名字應留夾袋中。
呂紫正雪景

司空幕府通農閒，平善街頭日夜來。
肯信瑤花舊游處，至今猶唱紫雲回。
杜牧

蘇州太守白尚書，酒盞飄零帶疾移。
老去風情猶有在，張娟駱馬與楊枝。
白樂天

李白才名天下奇，開元人主最相知。
夜郎垂老迢迢去，不記金盞走馬時。
書生豪氣歷千軍，示者扶桑一卷文。
鐵研未穿時世改，功名回首信浮雲。
桑維翰鐵研

千載經綸一秃翁，王公誰不仰高風。
緣何坐所添丁慘，不住山中住洛中。
盧仝煎茶

送文溫州

日月徂暑時，風布和遠將。化離撫筵悲，歌左右行。
鵬絳御猥多，墨札參橫。冠帶崔駘，絙絃嘈嘈。
嘉木婆娑，孔雀西南止於丘阿。我思悠悠，慷慨奈何。
題墨花

噫涕春風欺薄羅扶頭宿酒想輕歌牡丹花滿蛤蚧到學士其如此夜何

題畫

春風修禊憶江南酒榼茶鍾共一擔尋向人家好花處不通名姓卽停驂

旅館題菊

子畏過亭德有旅館人懸畫菊子畏慨然有感題云

黃花無主爲誰容冷落踈籬曲徑中儘把金錢買脂粉一生顏色付西風

附見張秀才靈

靈字夢晉吳縣人性聰慧善圖畫關涉精籍潛識強誦文思便敏驕曼可采家本貧窶挑達自恣不爲鄉黨所禮祝允明嘉其才受業門下與吳趨唐寅最善寅嘗邀遊武丘會數買飲於可中亭且賦詩靈更衣爲丐者賈與之食啖之且與談詩詞辯雲湧賈始駭令賈詩揮毫不已凡百絕抵舟易維蘿陰下賈使人跡之不得以爲神仙賈去復上亭朱衣金目作胡人舞形狀殊絕初靈與寅俱爲郡學生鄞人方誌來督學惡寅爲古文辭欲斥之靈悒鬱不自遣寅曰子未爲所知何愁之甚靈曰不聞龍王欲斬有尾族蝦蟇亦哭乎果爲所斥罷躬操力作糜飧不繼人或非笑之靈曰昔謝豹化爲蟲行地中以足覆面作忍恥狀使靈用子言固當如是亦安得更

啣鑿落耶闔起山二科志狂簡二人靈居桑悅之次稱其家蹇被斥自畫
無俚嬰情酒德不渝前操謂之狂士可得無媿焉

玄墓山紀遊

玄墓名山久注思少携閒伴是春時隔窻湖水坐不起塞路梅花行轉遲
清福可教何日領閒情曾有幾人知漫收形勝歸村館夢裏烟霞亦自追

臨終詩

一枚蟬蛻榻當中命也難辭付大空垂死尚思玄墓麓滿山寒雪一林松
祝京兆允明

允明字希哲長洲人叅政顓之孫徐武功之外孫也五歲作徑尺字九歲
能詩內外二祖咸當代魁儒耳濡目染貫綜典訓發爲文章茹涵古今或
當廣坐談笑雜選援毫疾書思若泉湧弘治壬子舉於鄉王文恪爲主司
手其卷不置曰必祝某也旣而自喜以爲能知人連試禮部不第除興寧
知縣稍遷通判應天府亡何自免歸卒年六十七希哲生右手枝指自號
枝指生好酒色六博善度新聲少年習歌之間傳粉墨登場梨園子弟相
顧弗如也海內索其文及書贊幣踵門輒辭弗見伺其狎游使女伎掩之

皆稱載以去為家未嘗問有無得俸錢及四方餉遺輒召所善客噉飲歌
呼費盡乃已或分與持去不留一錢每出則追呼索逋者相隨於道路更
用為怵笑資其歿也幾無以斂云顧璘曰希哲超穎過人讀書過目成誦
鉅細精麗咸貯腹笥有觸斯應無問猥鄙學務師古吐詞命意迴絕俗界
效齊梁月露之體高者凌徐庾下亦不失皮陸玩世自放憚近禮法之儒
故貴仕罕知其蘊書學自急就以逮虞趙上下數千年罔不得其結構若
幾獻真行懷素狂草尤臻筆妙子續舉進士官終布政使刻其遺文曰祝
氏集略他書如蠶衣罪知錄野記之類凡數百卷

前緩聲歌

瑤川遵穆晏汾水從軒游玄王啓靈會道官亦交酬蒼禽唳金支瓊鸞翫
釋幃靈賓憂韻石子登引空謳聖日麗萬舞祥吹振清球川后迎皓蜺波
巨趨翠虬湘姬偶瑤席巫女行玉羞天老獻秘文聖年無時秋

述行言情詩

六首

七世美仁里八葉通德門五教植本始百行郁華文仁義日可見金玉作
膺言難鳴繩準出舉足官徵存厚趾靡顛丘長津從列原何為末受者卑

垢辱華先

高閔衆祥集泰日百美具豐屋陵飛霄崇樓臨大路高齋敞華器芳臯羅
嘉樹良疇經邇郭麗舫汎妍激紳杖旦日臨星曜時夕聚羣公電威儀百
彥盡能賦圖書恣離核琴瑟鏗在御崇議每徵今幽求競稽古卮言藹蘭
馥雄辨激水怒觴誅富章什絃吹暢情素西園繼清夜何愁白日暮
績勲惟在力獲應非緣劬每當紛紜間儵忽發靈虛皇樞一納牖神明隨
問如其來眇亡岐須臾克九區猶操獨繭綸一引盈車魚又若陟春園萬
榮一時敷研覈皆可食百寶皆甘腴由來自不識祗覺本所儲

壓榆焚石屏堦垣卑四周前楹舒廣場後宇環澄流微淪帶山趾半覆花
竹幽長夏且游浴高蔭終日休豈必商丘開點爾聊同游

雅尚窮閭覽邇蹤愧卑纏臥遊空能賦道觀多歷年終南華岳接峨眉太
白連九疑元無地太行非有天岱宗日華浴祝融星漢懸朝食赤城霞夕
拂匡廬烟洪河春裂壤橫江秋勁弦因過洞庭水自櫂瀟湘船東海本吾
宅太湖襟馬前龍宮多寶藥洞穴鎖禹編靈期似當值旦暮相付傳
璇穹積重霄迴運迅不停曜靈爍神燭望舒循九行三垣列君臣萬緯流

物形河漢夜半轉四時各財成靈憲炳乾文至精存吾微

和陶飲酒二首

然燭能為月搖翳能為風手有造化能身在造化中順時以道用天人乃相通如何負折鼎而欲求張弓

青天恒高高欲上不可得支成食馬肝漢武知復惑狂念如推瀾滔天不容塞坐此弊其軀亦復幾喪國吾有升天方難言姑緘默

己巳閏九月十三夜夢中為游山詩

春觀入西岫區名意自別松嵐結幽賞蟲鳥弄餘悅花氣韻蒼沈樹膚落翠雪天行無塵染丘臥自雲潔心在道不違未覺萬物裂三爵已餘酣清

心寫泉月

春日醉臥戲效太白

春風入芳壺吹出椒蘭香累酌無勸酬頽然倚東牀仙人滿瑤京處處相迎將携手觀大鴻高揖辭虞唐人生若無夢終世無鴻荒

別唐寅

長河堅冰至北風吹衣涼戶庭不可出送子上河梁握手三數語禮不及

壺觴前轅有征夫同行竟異鄉人生豈有定日月亦代明毛裘忽中卷先
風欲飛翔南北各轉首登途勿徊徨

沈憤

燭龍奔天衢不照雲下人陽貨盜玉弓仲尼糧絕陳筆絕春秋成乘桴泛
洪津莫食汨羅魚腸中有靈均青天上無路黃泉下無門漫漫長夜中萬
古齊一塵

知山堂雅集

小山不妨官中隱從近闕無論車馬色幸共禽魚悅風泉夕韻復霜月冬
氣潔醒醉齊一襟心賞方茲結

龍川山中早行

磴磴左山影橫截右山腰辨色鳥謹翔微光澆晴朝浮雲若中斷蔚蔚方
行遙

朝雲山腰生我在雲中行只恐雲載我飛上白玉京世塵邈已隔天雞猶
未鳴須臾微風發東極金烏升

怨詩

繁霜隕衰秋萬物無一歡后稷苦望歲仲尼唱倚蘭東海有愁龍西崖有
憚鬱文王舊時操極古無人彈

灤水官舍

皇州本叢麗倅府亦多暇高木停車蓋白石砥根下雞犬寂不聞明憲晃
低亞礪奏不弦琴山橫無筆架流雲過簷牖斜照盪書畫巖居固同此此
寓未稅駕

夏日林間

空林坐遠暑松蓋載炎日重陰集涼氣薄吹颺亦及幽禽時度語遙礪汎
清瑟厨人列齋素稚子來共食援琴弄山海頗復似加適牛羊下前山自
入後簷息余亦杖策迴今辰茲已夕

夢唐寅徐禎卿亦有張璠

唐生白虹寶荆砥夙磨磷江河鯤不徙魯野遂戕麟徐子十口周遠討務
精純遑遑訪魏漢北學中離羣伊余守初質温故以知新誰出不由戶貌
別情還均濁世二三子厭棄猶為人相逢靡幽明隔域豈不親茲塗無爾
我相泯等一真昔亦念張孺猶能逐冥塵

顧明府榮夫

雞山燕市每依依此日都拋入洛衣家近鬱林公舊隱門如彭澤令初歸
空憐舊社惟君密却笑無車訪我稀最愛滄浪池水好幾時同坐一方磯
葛隱居汝敬

獨承華緒振芳塵想見先公氣魄新開口只傳前輩事存心不共此時人
城中紫陌藏巢許門外青山是主賓布褐一逢埃土盡誰言叔度賤還貧
懷表第蔣燁允暉

風雨牀空坐燭闌分襟兩見歲華殘蕭條鷗鷺江湖闊寂寞官商草樹寒
王謝風流吾子在武功中外老夫單懷君有句君應笑不向滄浪共釣竿
寶劔篇

我有三尺匣白石隱青鋒一藏三十季不敢輕開封無人解舞術秋山鎖
神龍時時自提看碧水蒼芙蓉家雞未須割屠蛟或當逢想望張壯武揄
揚郭代公高歌撫匣臥欲哭干將翁幸得留光彩長飛星漢中

八詠

禁省

形華耀芝蓋初旭浮絳纈紫殿切五雲曉表雙蟠嶼千門洞陰陰天光互
明滅英英鳳翼擁肅肅羽旗列仙韶忽然奏鳥獸咸應節息壤上玉陛丹
書出金闕

軍戎

西北羽書急半夜渡湟水上將受鉞出壯士把弓起天王跪進鞍四海盡
雪恥殺氣入匈奴萬里地色紫瑯戈插犀甲鐵勒封馬齒平生百戰身常
擬一日死

田家

溪流浸茅宇短簷挂犁鉏柔桑交午陰幽禽時相呼稚子跨犢眠夢歸候
朝餽稼翁擇其勞覽往攜陶壺老妻督少婦擇藟停辟纒輕雨日日零羣
苗盡懷蘇

漁釣

幸非城市住不舍烟波宅白鳥麗金沙蒼莓繞黃石涼陰木澗青平遠水
天碧梁寒魚盡落稍晚蟹猶瘠脩輪倚筇笻敗笠蓋檉楨沽酒自易醉楓
根忽終夕

禪林

泥洹金為地祇園寶作坊蓮猊兩足尊天龍億萬王燈存千歲欲鱗騰百
種香精舍坐苾芻屈曲蜂聯房又如拘陀葉處處蔭清涼暫栖蘊已空弘
慈不可量

宮觀

霄霞抱琳館蘿陰絡澗逕龜游烟沼煖鶴立天壇淨微香拂幽洞欲覓風
不定雲房並懸簾晝日鎖虛靜琪殿臨高臺時聞落瑤磬循除步周匝徧
扣無人應

俠少

三游本豪武七貴原驕惰腰間血七耀頭上金丸過艷妓掌列盤饜童口
承唾高樓沸歌鍾王侯日盈座殺人不須仇睚眦家立破郭氏族盡滅銅
山死猶餓

宮闈

十五事君王三十色未接醴篠空近羊蕙藹不集蝶昔嘶鴟夷泥今免呼
韓挾天天東鄰子看星誦桃葉塗黃斷橫雲流紅漬團圞金微幾千里一

夜去來疊

太行歌

上客坐高堂聽僕歌太行六歲從先公騎馬出晉陽遙循厚土足忽上天中央但聞風雷聲不見日月光狐兔繞馬蹄虎豹嗥樹旁衡跨數十州四面殊封疆童心多驚慄壯氣已飛揚自來江南郡佳麗稱吾鄉邈哉雄豪觀寤寐不可忘人生非太行耳目空茫茫

金臺

東南控瀛海西北壓胡塵召公上輔周文侯方用秦子丹養君子不惜如花人昭王禮郭生崇臺懸黃金齊方入騶衍梁邦來劇辛從來燕好士疆國尚功勳

漂母祠

子胥逢擊絮遂爲鞭是人淮陰遇漂母終亦去亡秦囊傑與輝媛萬年共一塵清淮映古廟月明空沄沄安能問市上復問哀王孫

題畫

季冬雪重積十日奇寒涇啁啾聞不聞葱蘢失其故客子欲何歸中林猶

獨步幸有蒼蒼松爲辨去來路

神游篇贈黃勉之勉之將遠遊先自呼爲五嶽山人

帝遣河上公下來赤縣游采真金庭房漫衍三十秋禹書眇一策詎幾窮
沉幽蘭香悅亦感安能久綢繆回首視泰元紫烟覆神州壘落結五九杼
軸冥交鈎內笈千神鈴星雲表沉浮猿鹿總千歲桂姿無年休雨露黯在
下日月環輪流憶昨鶴上客招邀玩滄丘子旣夙邁之飄然躡霞輶長歌
我勸駕神偕足孤留金鳥鳴日覲玉女呼洗頭三壺風帆迅弱水不容舟
隨風唾珠玉空徧口口收聞有金光草窮墨無所投升華星辰宮忽恍垂
前旒長跪問寶葦八荒極探搜一餐換塵骨萬品皆蟬蛻與子無往來道
遙齊所求

尚書內相毛文簡公輓辭

休辰盛文化畿吳富登庸蟬聯首四方藹藹來毛公翼翼寶玉執桓桓岱
山崇翊亮總王禮啓沃諧王衷三朝補闕表百辟詹清風職思謹詔相不
絀亦不竦公薨后弔恤哀榮天壤終

濟陽登太白酒樓卻寄施湖州勝之

昔聞董糟丘嘗爲李白天津橋南造酒樓人見二子不可見唯有傑句挂
余心肺爛爛珊瑚鉤長安風沙住不得南歸再臥蘇臺秋泊舟濟陽城買
酒銷客愁登樓拜先生進爵澆黃流知章不語先生笑飛花亂撲過樓頭
金陵更無鳳凰游岳陽莫將黃鶴留鄉閔浮雲蔽落日題詩却寄施湖州
余爲先生牛馬走湖州乃是賀老儔西塞山杜若洲與爾相期釣鰲去千
年江海同悠悠

清溪宮夢仙吟

都邑聲色區此有蓬蘿風黃埃不入門十月清溪宮幽閣掩竹牖舒足眠
高春隔林羽衣人焚香鳴槁桐微火繁屑沉綠塵婉空蒙淒絃汎寒聽引
聲入雲中吾不解世曲聊與神明通思借大鯤翼小戲滄海東微暝已復
來客調猶未終

戴進風雨歸舟圖

黃陵廟下瀟湘浦西風作寒東作雨鷓鴣啼舌到無聲誰管行人望家苦
柳州刺史幸不違長沙太傅音塵非翠蛾斑管在何處萬古重華呼不歸
唐寅畫山水歌

杜陵一疋好東絹，韋郎上植松。兩餘唐寅今如曹，不與有客乞染淞。江綾前山如笑後，如怒疎林如風密。如霧黯黯渾疑隔，千里蜿蜒忽辨綠。溪路黑雲沍蒼梧，丹霞標赤城。壯哉畫工力，九州通尺屏。兩崖遠立翳兩角，一道空江浸寥廓。吳綾本自淞水剪，誰把淄澠辨清濁。茅齋傍江絕低小，羨爾高居長自好。今年吳地幾魚鱉，看畫轉覺心熱惱。黃金壺中一斗汁，我欲濡毫映手濕。莫教童子誤撥翻，忽使癡龍攜雨出。

王右丞山水真蹟歌

生烟漠漠中有樹，樹外田家幾家住。重巒複塢隨不斷，茅舍時時若菌附。兩人並向魚梁涉，一鳥遙從翠微度。行雲澹映荒水陂，似有斜陽帶微煦。傍篠白沙明青林，滄沉霧乍明乍晦。景萬變想當夏盡秋初處，石牆短椽隈隈水淺縈迴。寬平一畝敞層屋，板扉犬臥無人開。書堂樹深畫寂寂，主人應是王摩詰。清晨騎鹿看田出，行過柴泝日向夕。會招高適與裴迪，共賦輞川佳事畢。圖成興盡詩未筆。

暮嶺歸樵圖

吳山嶺頭風蕭蕭，吳山落日紅抹腰。蜿蜒鳥道自能認，只在山中非市朝。

燒薪煖酒換魚煮五十行歌氣如虎朱翁側足金馬門吾儂未舍無媒路

董烈婦行

大壑松不彫高山石不朽覆載無改易世有董烈婦烈婦王氏名桂芳十七嫁與董家郎董郎臥瘵一年死烈婦嘔血手斂藏當時信誓對日月誰能上掩日月光死生契闊志不違老姑無依老母嫠母與烈婦伯父期他年徐與重結縭爲言汝壻昔僦居壻死居停主人將奪之汝曷來歸與汝棲與汝伯父相因依烈婦聞命志益悲未聞太行王屋曾爲愚公移天地生我死我自處何有一撮茅土爲總帷啼眠風灑灑母日護之不少舍後數日母去謂汝送我而後返吾不汝詐婦勉從母歸稍進一飯啜啜哽塞不能下長號浪浪淚滿把投七日我去母復送之野烟雲慘淡日一抹宣公橋下水潑潑婦云母乎河水清且淪漪吾往從之樂不可遏母聞驚絕色慘怛大呼褰裳不可脫漸壺水涘瀨水闊斷萍芒芒強令活去矣還復入君門抱君靈主哭愬君君神在木聞不聞肉摧血裂魂紛綸母去兒解防兒身終自姑兒有十尺麻爲君繫三綱麤糲髮經移在脰玉質高懸几筵右手持元氣還乾坤青天增高地增厚是時婦年纔十八英風烈烈塞宇

宙嗚呼十五國風一其美南朝惟見李侍郎忠節不但臣節慶爲爾君夫
何獨幸豈第君子洪嘉興二年一日風教行爲爾成墳救埋玉彤管有繹
光熒熒豈徒肇家聲豈徒信鄉俗歌謠長吏澤愛戴國家福慰存盡封誥
樹勸望旌復嗚呼天下多美人人百其身倘可贖

將歸行

丁丑九月還與寧廿七夜渡頭舟中作時慈親在吳室人
在廣見在燕

老龍渡頭秋欲歸炎州霜輕葉不飛江東游客未授衣羅衾支枕歌式微
自余之來日三北燕吳萬里稀消息高堂夢轉眼冥冥山圍蛋船天潑墨
南溟有龍不可屠北山有虎不可誅鴛鴦相望懷慈鳥况有嶺南多鷓鴣

悲秋 二首

荏苒來鴻去燕期騷人切切有相宜漢宮新調初翻葉素女哀音半破絲
欲賦心懷無那意少咨時事未能癡長風短雨時時過爲暑爲涼不可知
野老今年齊騎省不從今日見毛斑行過日月知多暇坐愛星河不可攀
俯仰隨時看物易尋常談事到身難登登兩展江南閣蒿目西風望子山

秋宵不能寐

官街徹夜鼓聲悲萬古渾無至靜期百事生來酒醒處七情傷向夢回時
紅顏交代將人誤青史升沉與世移獨起挑燈映窗坐秋光月色共參差

丹陽曉發

京邑到來熟曉行如赴家月明人渡水星散樹驚鴉燈影依依店茶聲遠
遠車蕭騷兩秋鷲無處定生涯

江行

渡口人爭發出江舟已微鐘聲離岸小帆影逐星稀朔雁連雲度寒潮伴
月歸蒼然山一帶隱隱伏長圍

長途

長途只是水連天好景惟應月帶烟獨有流鶯與飛絮見來渾似綠牕前

京館聞鶯

天風吹出掖垣聲瀏亮緜山午夜笙錯認闌門折楊柳一時飛夢滿江城
自末春入初夏歸舟卽事

往往花移色交交鳥換鳴雲將京國遠水別衛河清高嘯迎風轉低眼看
樹行殷勤吳郡酒還得此時情

法駕

蔚藍天上鬱蕭臺五色雲旌雉尾開法駕幾多牛馬走不教凡世一夫來

壬申閏五廿六曉紀懷

龐葛空聞有鳳姿仲謀聊可道佳兒病身日對干戈臥別淚時看尺素垂
半夜雞聲猶慷慨平生驥足竟驅馳無因便把漁竿去羞向斜陽弄鬢絲

閒居秋日

逃暑因能暫閉關未須多把古賢攀并拋杯勺方爲懶少事篇章恐礙閒
風墮一庭鄰寺葉雲開半面隔城山浮生只說潛居易隱比求名事更艱

絕句

白眼青天萬里心門前世事正浮沉日斜睡起無聊甚獨倚闌干看樹陰

醉斷酒二年偶復一醉爲此壬申季夏十七日也

醉來中歲裏那復有童心祇覺忘人我何爲更古今山河秋兀兀星露夜
悄悄惆悵惟陶阮懸知磊砢襟

早春江行

五十六年行役身又漂萍葉及初春相燈向楚吟殘句江雨敲牕夢故人

鸞轉上林空倚醉月生南浦幾傷神還家想得兒童笑毛髮蒼浪綠綬新

縣齋

縣齋孤坐整澄懷未覺飛光兩矢催夜雨鄉關歸夢久夕陽門巷壯心迴
非因傲吏偏違俗且喜微邦稱不才坐起忽驚詩景入西南山色隔城來

循州春雨

物候逢春好春來悶轉淡山城十日雨家國百年心海吹饒生冷蠻雲易
結陰循州本謫地何待此愁吟

廣州戲題

生世投閒四十季瘴江班頂試鳴絃今朝也是爲官日白日青天閉戶眠
丙子重九戲題

行年五十壯游腸幾把他鄉作故鄉萬里一身南海畔客牕獨看兩重陽
戲爲口號四月三日苦竹派道中

遠人羈客古今悲昔日情看惜別詩六口一家分五處爭教不作斷腸詞
廣州別表弟趙二

海邊三載試琴才省問煩君兩度來天闕風鵬嗟轉徙秋淡霜鴈獨飛回

計程驛路過江權屬買漁簑掛釣臺別酒多傾也能醉歡情不似故園杯
已卯春日偶作韓致光體

亡羊何日返初岐失馬由來未用悲靈藥不消心底火世情猶惡夢中棋
三年紫陌長虛屐一紐銅章只礙詩好景好將閒領取淡烟明月兩參差

庚辰二月廿七日曉官窰舟中口號

世棋年矢兩相催絕嶺春深與鴈回無限胸中未訓事篷牕燈枕酒醒來

危機

世途開步卽危機魚解淡潛鳥解飛欲免虞羅惟一字靈方千首不如歸

夜歸

雨洗秋光萬井明風高雲破月微生還家莫道長酣寢纔聽雞聲又出行

次韻表弟蔣燁及門生翁敏見贈喜予歸田之作四首

中條不改舊王官猶喜書淫共士安漢女紅顏非自誤阮公白眼向誰看
農人問稼教多秫道士裁筠贈作冠自喜車來皆長者祇應親舊倍添懽
荷鋤欣種淵明田坦腹還如嬾孝先登山自蠟平生屐載酒時過遠近船
焉知魚鳥升沉性齊得椿菌小大年却笑人間心尚在欵將青史訂愚賢

忙是揮毫靜弈棋
雕闌日轉夢回遲
時從玉右軍臨帖戲學張京兆畫眉
傍水近開三益徑
停車徐誅四愁詩
新來最滿平生意
樓上看山獨坐時
高眠不怕喚當關
一月華胥游未還
意在可兼無可處
身居材與不材間
瓊敷玉藻六七子
金雀雅頭十二鬟
愧有金陵無李白
棲霞卽是虎丘山

臥病

缺掌思將適野情
偶緣風火便相嬰
懸知智鄙同爲虐
且喜閒忙總不行
服餌轉令諳物性
靜思因得檢長生
醫經士典都餘策
一卷南華萬物平

無題

亭角樓牕取次憑
東風不送笑歌聲
山村水郭城西路
却放朝雲此處行

漢室

漢室咸陽建山河
百二開甘泉芝草出
天馬大宛來宣室
宵衣問長楊獻賦
回寧知天祿闕
不用子雲才

錢唐玄妙道院夜賦

枕席錢唐館更時
未北還每當身作客
轉覺意能閒
雨氣橫秋海潮聲入
夜山道人看默坐
應笑鬢輕斑

山牕晝睡

身在雲房夢亦閒
松頭鶴影枕屏間
一聲隔谷鳴華雉
信手推牕滿眼山

寓黃輕車宅雨夜禁直歸因戲贈

黃昏冷雨濕金鞍
鞮履提巡繞禁鑿
星散羽林霜氣肅
天臨華蓋夜光寒
鄂君去後衾猶薄
京兆歸來黛已殘
知有游人臥齋閣
一般飛夢出長安

宿金山寺

牕中一抹海門焦
珠貝魚龍共此宵
枕得善財叅後石
洗來天漢轉時潮
神遊會解靈妃珮
耳靜能傳少女簫
况是梵王宮闕裏
蓮花葉上翫逍遙

秋晚由震澤松陵入嘉禾道中作二首

晚發西南郭
秋深雨氣偏
人家低似岸
湖水大於天
日崦長如閣
風檣不用牽
辭燕還入越
纜費半流年

湖尾橫波急
船頭轉港頻
幾家危傍水
一木老存身
黃菊看如客
青山坐送人
空舟隨處泊
不用擇行鄰

暮春山行

小艇出橫塘
西山曉氣蒼
水車辛苦婦
山嶠冶游郎
麥糲家家碓
茶提處處

處篁吳中好風景最好是農桑

三月初峽山道中

春陰春雨復春風重疊山光濕翠濛一段江南好圖畫不堪人在旅途中

與吳大飲酒

世事浮雲幾變更鄰居長聽鳥嚶嚶細編俯仰間今古青眼摩挲老弟兄
樹下送聞高嘯飲水邊聯袂細吟行胸中三十年來氣終不銷沉負友生

寄謝雍

謝家蘭樹有清芬每誦澄江却憶君想得山庄長夏裏石牀眠看度牆雲

贈朱孝廉性甫

百年貞白舊高樓傲兀風埃六十秋楚聘尋常來北郭魯呼前後只東丘
書抄滿篋皆親手詩草隨身半在舟前輩風流惟此老天公多爲後生留

友人郊墅

孤墅倚高原扁舟晚到門琴聲虛草閣月色滿江村霜落魚鰕出烟收花
竹繁不須燈下坐臨水好開尊

足夢中句

遠公蓮作社陶令柳爲門止酒用卿法攢眉吾不言白雲時或出黃菊故
應存二老皆寂寞千秋誰共論

題湯三城南莊子

嘉樹夾茅堂城南十畝莊竹窻遙列岫花樹密圍牆兔捷且施路魚肥笱
在梁每來無世事祇覺道心長

武帝傳

柞宮憑几畫成王淚落銅仙月似霜王母不來方朔死茂陵松柏自斜陽
昆福寺

壞閣尚岩崑寒房繞寂寥木撐危殿角草出斷碑腰門鈴疑塵滅香鑪火
氣銷竟空惟佛觀亦自有榮彫

隱者

白石薜蘿房青山雲水鄉琴傳雷氏斲書是汲丘藏鹿友同無我蜂分亦
讓王枕中藏雅道一臥卽羲皇

再輓子畏

少日同懷天下奇中來出世也曾期朱絲并絕桐新韻黃土生埋玉樹枝

生老病餘吾尚在去來今際子先知當時欲印樞機事可解中宵入夢思

贈承公

牆外西林是寶坊林間高臥有支郎定回斜日雲穿衲吟斷寒更月滿牀
妙梵遠通潮隱隱清陰分與柏蒼蒼何時爲取無生話共了趺蒲一夜長

贈鄰院淡上人

竹院名童子茅齋坐已公亦如王舍內却愧魯家東共味井泉接分陰樹
影中閒眠時唱和律呂隔牆通

贈安愚柳大中

章甫玄端行秘書穹窿山下竹林居淫如玄晏道不遠愚似龍城樂有餘
皮几丹黃朝硯雜烟窻鉛素夜燈虛人間幸有雲龍遇慚愧無因屢命車

贈楞伽院老僧

庭前柏樹手摩挲世壽寧如僧臘多何物與師相伴住楞伽山色石湖波

贈道士

龍子遺將海上方換除烟火世間腸三花樹頂千秋雪七寶宮中萬杵霜
瓊管綠簫通廓落碧文金檢佩琳琅松門晝掩烟蘿合獨在峰頭侍紫陽

送蘇瑾

柳枝不折折梅花帶去吳中舊物華
白雪黃雲迷鴈影片帆明日是長沙

靜女眠春曉

陳月元非璧荆雲本是人抱衾辭未夜
失枕臥嬌春嘶馬應南陌流鶯在
北鄰城隅如可俟無事夢含顰

無題

強笑爭禁別恨牽病容憔悴性依然
梨花小院留人坐羅帳燈昏夢二年

戲題秉叔燕月之什

二首

一飲瓊漿骨不塵五陵才子筆通神
簾前隊隊紅妝坐誰識當年姓沈人
無限香雲不斷霞鳳凰臺下謫仙家
丹山碧水桃千樹不遇劉郎未是花

秋夜曲

明月淡穿輓轡井蕉梧戍削藏石影
房帷螢火入還出綃被輕圍明玉冷

皓月

玉田金界夜如年大地人間事幾千萬
籟蕭蕭微不辨露繁霜重月盈天

秋宵苦雨

井上梧桐閣上鐘林間鳥鳥草間蟲與君盡是淒涼伴若伴愁人最是儂

錢題水仙

八斗才中畫雒神翠羅輕颺鞦韆尖塵雪溪老子真能事更比陳王寫得親
邊文進來禽畫眉

巫峽朝雲隔翠波仙禽無奈晚來多風流只愛張京兆日日章臺走馬過
徵明畫草

光風輕汎綠迢迢氣煖烟和未盡銷想得美人簾底坐月華斜流翠裙腰
堯民小筆

隱者高居不在城閒來搦筆寫平生藤枝策策從何去葑水東頭弔古行
小景

濃雲壓嶺雨初至密葉障林風更多只有漁翁能了事一枚圓笠半肩簑
絕句

忽見銀河水倒傾森森毛髮不勝清悟來只在空山頂臥聽松風夾雨聲

雜題畫景四首

江曲柴門日自關夕陽舟楫斷萍間寒流遠近長如玉流過漁磯更不閒

柳風欺水細生鱗山色浮空澹抹銀總道江南風景好從來都讓髡泥人
花滿百花潭北莊無人同出碧雞坊因風竹葉浮巾翠落地松花上履香
歷亂茆堂草樹深隱居蹤跡杳難尋只應獨自攜琴去小答松篁太古音

祝氏集外詩

祝氏集略別有金縷醉紅窺簾暘哉擲果拂絃玉期等七集集各有小序
題曰祝氏小集是京兆篋笥中物好事者多傳寫之亦韓致光香奩之流
也今附錄爲集外詩

綵雲東飛月向西效李紳相公鶯鶯歌

綵雲東飛月向西分光換景雙悽悽月華再與行雲遇人間有情誰是主
障紅掩綠心色幽歡情不滿哀怨稠傷鬱恨鵲如何許兩聲嘈嘈向歸路

憶神妃

不見瑤姬八載遙依稀聞說返丹霄靈雲秀雨今何在留與人間做寂寥

憶青娥

雲牕夢破十年春淺笑淡顰隔一春時節風光渾似舊燈花一顆照愁人

秋月

銖衣猶是舊霓裳帶得清虛府裏香今日輕分三萬斛乞他人世綠衣郎

秋香便面

晃玉搖銀小扇圖五雲樓閣女仙居行間著過秋香字知是成都薛校書

無題

再降微之與牧之依然記得轉輪時玳珠作性收圓業銀粉流香暢豔辭
紫鳳占祥羣玉府金鸞棲盡好花枝宜公正是青春日兩鬢光華未染絲

見仙

寶月香雲萬燭紅玉容當面出簾櫳仙人也愛人間樂只是人間無路通

閒題

錦翼文翎處處逢綵雲隨月任西東瓊漿醉骨三千歲玉顆聯情一萬重
狂蝶不曾離寶苑好花都願嫁東風醉斜小杜吳王國錯認揚州十里紅

杜蘭香再通玉期

墉城冥約久茫茫半夜颺輪送遠香月墮雲中千里易玉生田下十年長
榆花會結填河駕瓊液尋傾止渴湯何日秦樓緣事了一聲橫玉兩文凰

一曲

一曲嬌歌酒一觴難醒難醉又難忘爭知一別還非易滿地月明歸路長

想得

斜陽流影入房櫳複綠重紅掩映中想得那人新睡起倚牀閒鬢繡綾絨

何時

曾是春樓有好期幽歡曾遣別人知一團羞顛惟愁慢萬種妖嬌不定疑

玉穴精神迷肺腑花房春味逗腰肢何年更作朝雲夢一日懸情十二時

夢蘇道人詩六首

王銜字元禹別號夢蘇道人少讀書於婦翁劉仲窗得其議論為多隱居荻渚以著述自娛吳文定表其基

邀祝秀才 二首

懶逐潘家榆柳塵扶攜看盡滿城春醉來不唱梅花曲自度新聲教玉

人

卿月花燈徹夜明吟肩隨處倚傾城明宵倘念孤寒客共對芸牕一短

檠

別後歌麗製不覺引滿大醉醉中成四絕句奉納

人言元白再來身我道奎中降下神誰遣瓊龍唱新曲江南添得十分

春

紅綃春墮絲雲中蜀錦吳綾一日空應是天孫擎好手特教凡世掃

工

的爍梅花嫩柳枝午妝人倚翠樓時蘇州更比揚州好况有才郎勝牧

之

假節何年使蜀川宿期空老雪溪邊尋春走馬閭門去幾處銀箏誤拂

絃

集稱取此

依韻奉和 四首

謫下司花小吏身芳菲國裏散精神輕紅重綠爭妍媚少箇蜂王未當春

自從元白去寰中重色輕情妙法空小住祝郎三百歲為他重作去聲挽

春工

樓鳳須當碧玉枝秋娘偏愛少年時蘭香蕙俊尋張碩桃葉憐才事獻之

風情儗我杜樊川慚愧秋娘擁兩邊俗眼從渠浪開合生來粘在十三絃

一把

仙魄迷花不自持花傷難藉草頭醫爭禁一把東陽骨消得春風日日吹

春游虎丘雜題 二首

春光滿郊野吾獨愛西丘碧水一池定白雲千頃流散人歌小海幼伎撥
篋篋遠著謝公屐高登王粲樓人生一杯酒又是一年遊
醉扶紅袖上飛樓又是新年第一遊欲撥詩腸重進酒誤將織筍觸篋篋

傷春

東風吹骨軟於綿病沈愁潘煞有權較綠量紅花債負斟濃酌淡酒因緣
三更坐月蟾妃覺十日啣花蝶使憐短帽輕衫休儗罷西山蹋遍柳枝烟
遙看隔水倚牕釣魚

芳原落日裏織女夜臨河灼灼呈紅玉盈盈隔綠波金裂約柔腕玉體挂
輕羅謾自傾銀海無因化水梭承伊纖手弄一作戲淡淡任如何

大槩

綠水蘭橈汎雜神隔關遙喚送情親匆匆不記仙人號大槩知同色界人
為黃應龍姪人史鳳翔題扇上景

綽綽輕紅廣袖垂遠山移翠上蛾眉闌干倚到春深處雨煖雲香日正遲

徐博士禎卿

頑卿字昌毅一字昌國常熟人遷吳縣
馬天性穎異家不蓄一書而無所不通與吳趨唐寅相友善寅薦於沈周
楊循吉由是知名屢臺試不捷感屈子離騷作歎歎集論者以文章江左
家家玉烟月揚州樹樹花爲集中警句雖沈宋無以加又斷作詩之妙爲
談藝錄弘治乙丑舉進士除大理寺左寺副乞徙南就養會失囚降國子
監博士卒于京師年三十三顧璘國寶新編曰昌毅神清體弱雙瞳燭人
幼精文理不由教迪著交誠感慕賦諸篇詞旨沈鬱遂闢晉宋之藩凌隲
曹魏長宿驚歎號爲文雄專門詩學究訂體裁上揆騷雅下括高岑融會
折衷備茲文質取克棟之草刪存百一至今海內奉如珪璧所謂雖多亦
奚以爲也其所研索具在談藝錄中斯良工獨苦者與昌毅少與唐寅祝
允明文璧齊名號吳中四才子徵仲稱其才特高季甚少而所見最的其
持論於唐名家獨喜劉賓客白太傅沈酣六朝散華流豔文章烟月之句
至今令人口吻猶香登第之後與北地李獻吉游悔其少作改而趨漢魏
盛唐吳中名士頗有邯鄲學步之誚然而標格清妍摘詞婉約絕不染中
原儉父槎牙寡兀之習江左風流故自在也獻吉譏其守而未化蹊徑存

焉斯亦善譽昌毅者與余取昌毅五集暨迪功集參伍錄之使談藝者自
采擇焉

擬蕭子顯春別曲 四首 以下迪功五集

雜草積色滿河塘楊柳覆額映嬌黃春心春望不可極隴北遼陽俱斷腸
春風戲蝶一庭花落日聚雀空城麥半牀敝帳掩朝寒滿鏡新愁減釵澤
貞志寧忘陌上桑同心共指西陵柏

鳴鵬欲亂花發齊江南草長綠葉萋三邊遠戍十年妻驚顏感候那不啼
霧裏纖纖新月光機中少婦織流黃可憐斷絲不如淚零落時續不能長
誦陸厥李夫人歌因效其體詠漢武

鬱金臂上香龍燭帳中光昔時愁夜短今時怨夜長長夜怨徹且思情漠
漠魂離離新宮夜雨生香草故苑秋風銷桂枝欣見帷中步翻成夢裏悲
效何遜詠倡家

簾櫳秋未晚花霧夕偏佳暗牖通新燭虛堂聞落釵浙浙烏棲樹明明月
墮懷相思不可見蘭生故繞堦

代煬帝寄內人曲

藕絲一尺自言長
情人懷情那可量
願得牽心渡淮水
勿畏風波作小傷

擬謝朓邯鄲才人嫁爲厮卒婦

靡靡辭掖庭
殷勤謝故媛
今朝一羽捐
宿昔千金選
自怨恩命薄
不恨紅顏賤
夜雨長
靡蕪秋風入
團扇那忍見
可憐脫釵市玉燕

效庾信作

綺梁文桂刻椒壁
石脂漫鏡牀
雕孔雀窻箔
織青鸞斜牖
銀河轉空庭
白露團梨花
初浴霧竹影尚低
寒不知紈帳裏
誰復夢懷關

秋氣篇

邊城秋氣肅
夜慘角聲長
廢草烟中綠
寒雲塞上黃
萬里警烽火
十載憶河梁
聞砧俱掩泣
見月共愁鄉
亦有觀津婦
仍聞洛下妝
啼粉生陰藪
孤衾戀故香
當牕工織素
織指怯縫裳
絡緯蕭蕭雨
蒹葭夜夜霜
鏡塵淡一尺
書淚漫千行
妾心豈畏晚
思君誠可傷

步出西閨吟

步出西閨里
草繁路如縷
四望何所有
遙見丘墳鬱
廡廡悲風蕭
條百鳥聲
寒日潛光昏
黍稌低徊步
念不自己
魂魄終當歸
此土還家語
妻子桃李

獨立

獨立溪烟絮帽斜行人停路問三叉兒童樹底燒殘葉估客河中問酒家
日暮啄饑喧野雀天寒爭宿集荒鴉官橋寂寞梅花發愁見南枝又歲華

和荅石田先生落花

四首

不須惆悵綠枝稠畢竟繁華有斷頭夜雨一庭爭怨惜夕陽半樹小淹留
佳人踏處弓鞋薄燕子銜來別院幽滿目春光今亦老可能更管鏡中愁
門掩殘紅樹樹稀客車休訪雨中泥蜂攀故藥將鬚護鳥過空枝破血啼
半月簾櫳風不定一川烟景日沉西先生臥病渾難管拾得餘英豈更題
歌酒欄干事已非玉人惆悵捲羅幃可堪荏苒爭先謝更不躊躇各自飛
盡掃庭枝風斂怨偶黏塵網雨衝圍今朝蝶似長安客差况殘春寂寞歸
飄蕩東西不自持多情牽惹有飛絲恩私漫憶曾攀手精魄難拋未冷枝
每戒兒童搖樹戲空煩道路隔牆窺經春爲爾添新債開費清樽落費詩

書海棠扇

春風吹墮胭脂淚散作妖花一樹丹可奈五更清夢短杜鵑聲歇雨絲寒

觀舞歌

今夕何夕燈滿堂金釵夜舞華瑟傍香風拍袂紅雪舉玉腕矯矯凌虛翔
飄飄雲步蕩輕珮八鸞協律鳴鏘鏘花柔玉軟兩無力宛轉應節隨低昂
蟠身蹲伏龜鶴息延頸直跼龍長明珠圓轉盤四角新蓮袅娜波中央
繁歌急調相迫促紫燕雙入虛簾忙粉脂凝汗朱顏發明月空梁添素光
座中豪客燕趙產快賞一舉連十觴吳才雖不勝杯酌能握綺筆揮詞章
聊酬一曲當縑素清脫不讓滎陽郎滎陽涕泗苦不足風流詎及吳才狂

徐姬詩

金陵有徐姬者善屬詩蚤死余嘗聞其句云楊花厚處春陰薄清冷不勝
單袂衣頗愛其有婉思以詩弔之

繞廊吟罷楊花句欲覓楊花樹已空日暮街頭春雪散杜鵑無力泣東風
追錄舊作

衡陽聲斷鴈回蹤南國飄零烟莽中紙幔燃燈寒夜雨水樓吹笛菊花風
誰敲急杵催山月獨語愁心對草蟲病骨秋容兩無賴一樽揮袂泣飛蓬
效閩中語二首

小小亭臺曲曲欄支頤獨倚悄無言楊花飛處春衫薄風信今朝第幾番

繡罷還呼姊妹看
午風晴日滿欄干
花間打散雙蝴蝶
飛過牆兒又作團

春思

渺渺春江空落暉
旅人相顧欲沾衣
楚王宮外千條柳
不遣飛花送客歸

雨泊

蓮窩渡頭燕雙語
楊柳蕭疎洒飛雨
五日舟行一日程
客夢遑迴厭灣浦
溪烟臥水澹不流
沙草繁毛細難數
淹泊空灘歸意迷
背雨來船自鳴櫓

遊俠篇

以下進功集

四牡飭朱軒
俠氣何翩翩
夕鷲邯鄲道
朝馳函谷關
千金飾冠劍
寶服芳且鮮
徒御若雲浮
周道直如弦
堂中養死士
被服皆珠紈
櫪馬厭梁肉
貝甲委如山
片言傾五嶽
萬乘慕其賢
諸侯奉白璧
爲壽卮酒前
合從連趙魏
駕轂出齊燕
仗劍歸質子
矯節奪兵權
傲傲日中議
歎血重一言
雞鳴脫虎口
狗盜乃獲全
天地相盪蝕
四海如沸淵
憑軾一抵掌
解紛談笑閒
縱橫負奇節
逸氣蓋八埏
慨慷功名會
何言七尺搢
策勳山河溢
流光竹帛靖
何爲坎壤士
撫劍獨長歎

猛虎行

上山晨採樵下山逢猛虎
深林叢薄不可度熊羆
巉巖兮向我怒虎欲食
我低頭據地而長號使我
心悲淚如雨舍中無人言
父與妻爨下又無食使我
孤兒啼拔劍前致詞爾胡
不仁至此爲凌牙鋸齒食
人之肝拒骨而撐屍膏血
布川谷鳥銜其肉倒插東
南枝惻惻草野中行哭聲
正悲嬌女行採桑道逢野
虎搏食之滄浪之天更不
慈猛虎瞑目若搖思便復
舍我置道傍我欲東歸河
無梁縣縣邈邈思我故鄉
嗟爾行路人猛虎當關慎
莫行思我父母多苦辛吁
嗟猛虎白額狸斑而黑文
何不渡河而去從彼豺狼
羣城中咆哮竟夕聞吾將
訴汝泰山君猛虎行且莫
歌泰山之君奈何

苦寒行

凜凜朔氣運悠悠玄象馳北
鄙何蕭條漠野恒凄其崇
霜依岫結峨冰憑岸滋飛
砂塞門來胡馬厲長悲漂
漂密雪興靄靄繁雲垂窮
獸啼原澤饑鳥號樹枝無
衣嘆秦風卒歲詠函詩伊
予炎荒士飄飄寄邊陲風
土有本性狐貉非所宜飲
漿豈執熱懷續猶抱絺處
燥常冉瘍久涼誠惡痺寄
謝父與母遊子難久居

白紵歌 二首

三星燦燦花滿堂素腕盈盈出洞房垂羅映靛耀明妝
皎若雲中開月光流情盼君君莫忘停歌節舞進玉觴
願君安坐夜未央旨酒千壺列東廂美人如花嬌北堂
齊歌合舞聖世昌願得歡娛永未央脂車秣馬且踟躕
百年之會忽須臾東流之水西飛鳥今我不樂何為乎

鷓鴣行

白鷓捉黃雀斜盤下九天豈知南山側復有虞人弦
一發中雙翼忽斃青雲端行人皆撫掌仰視落飛翰
弓矢懸馬頭少年坐雕鞍持歸咸陽市百鳥爭聚觀
美酒白玉缸肉腊黃金槃樂哉今日宴四座爭萬年
黃初水月昌歎鷓鴣一篇足以上抗西京下視子建殆千載之希聲也

將進酒

將進酒乘大白碑磔為罌錦作羅燕京杜康字琥珀
朱糝三千酒一石君呼六博我當擲盤中好采顏如花
鶯鶯分翅真可誇壺邊小姬拔漢幟壯士失色徒喧嘩
拉君鞞勸君酒人間得失那復有男兒運命未亨嘉
張良空槌博浪沙秦皇按劍搜草澤豎子來為下邳客
一朝崛起佐沛公身騎

蒼龍披赤馬、滅秦蹙項在掌間。始知橋邊老人是黃石，狂風吹沙漲黑天。
天山雪片落酒筵，錦屏繡幙不覺燬。齊謳趙舞繞膝前，人生遇酒且快飲。
當場爲樂須少季，何用窘束坐自煎。陽春豈發斷蓬草，白日不照黃墟泉。
君不見劉伶好酒無日醒，幕天席地身冥冥。其妻勸止之，舉觴向天白婦
人之言不足聽。又不見漢朝公孫稱鉅公，脫粟不舂爲固窮。規行矩步自
銜世，不若爲蟲處禪中。丈夫所貴豈窮苦，千載侔儻流英風。人言徐卿是
癡兒，袖中吳鉤何用爲。長安市上歌擊筑，坐客知誰高漸離。我醉且倒黃
金鼻，世人笑我餽糟而揚醜。吁嗟屈原何清漁，父何卑魯連乃蹈東海死。
梅福脫帽青門枝，明朝走馬報讎去。襄子橋邊人豈知。

江南樂八首代內作

生長在江南，不愛江北住。家在闔門西，門垂雙柳樹。
陽春二月時，桃李花參差。寄言諸姊妹，莫遣惡風吹。
還鄉信自樂，望近轉於邑。阿母見兒歸，定自持僮泣。
野鳧生雛時，乃在河汜中。可憐生羽翼，各自戀菰叢。
橋生江上洲，過江化爲枳。情性本非殊，風土不相似。

人言江南薄江南信自樂采桑作蠶絲羅綺任儂着
與郎計水程三月定到家庭中赤芍藥爛熳齊作花
江南道里長荆襄在何處聞郎昨夜語五月蕭湘去

隴頭流水歌三疊代內作

隴水嗚咽流各自東西下生男不下堂生女棄中野
下隴磨剪刀刀澀指爪柔將刀斷割水那用東西流
隴水嗚不止似聞阿兒語出門不見人肝腸斷絕汝

少季行

生長在邊城騎射有聲名召募河源去長屯都護營登山望敵氣間道擊
胡兵十決推雄戰連呼扶漢旌雲中息刀斗天上掃霓槍坐弄胡笳月梅
花隴水清

從軍行

貳師將軍初出師橫行十萬羽林兒隔河追斬呼韓將烏壘高懸太白旂
五壘神兵下玉門倒傾西海蹴崑崙輕車夜渡交河水斬首先傳吐谷渾
調笑胡王坐玉鞍蛇矛丈八躍如湍天子戎衣遙按劍將軍直爲斬樓蘭

青天積路挂金微，明月沈河樹影稀。胡鴈哀鳴飛不渡，黃雲戍卒幾時歸。

平陵東行

共工觸天補女媧，后羿射之摧九烏。君不見泰山之高屹天柱，有時東崩海水枯。秦人築長城，東笞夷。朔北擊胡，開闔地戶。天下樞，九關虎豹下。食人鬪，骸飛血昏風塵。四海望之威天神，亦有荆軻起報讎。裂眦向天天爲愁，拔劍一呼震萬乘。快哉壯士誰與儔，儒生抗眉論堯舜，斂手待烹良可羞。上卿執珪古崇侈，魯生棄之若敝屣。鴻毛輕死爲二桃，笑殺田疆與冶子。龍蛇消息各有時，白石落落人豈知。季布髡爲奴，范睢乃是糞下兒。一朝雲雷起屯厄，揮刃脫縛揚高眉。我今偃僕困螻蟻，吹沙吸啣若鮒鯉。牛溲螬蟬豈足活，河伯向我誇秋水。夜夢憑雲忽上天，傾山倒海作龍淵。天門中開繞赤電，霓旌雷車導我前。空山颯颯走霹靂，草木摧拉飛炎烟。丈夫未足哀困窮，仰嘆白日回英風。不能鼓行青海上，亦當擊劍咸陽之市中。寧學鉏麇觸槐死，羞言投閣仕莽公。吾悲夫二子之死也，誠如寒蚓與秋蓬。

燕京四時歌 四首

天柳垂絲拂建章銀冰千片落金塘烟花萬國行人度遙指蓬萊春日光
暑殿金泉枕碧山清涼樓閣五臺間赤日不行葱嶺北雪花長繞玉門關
薊門桑葉落滹沱代北浮雲鴻鴈多莫向雲中傳尺素空將明月對蝴蝶
葡萄新酒潑流霞十月燕山雪作花天子後庭誇玉樹昭君胡服拂琵琶

擬古宮詞 七首

君王無事日臨戎
棘輪親調白玉弓
千騎紅袍齊扈蹕
臂鷹遙出建章宮
千場搏戲未言回
魚輪重重向暮開
遙聽雲中催羯鼓
君王何處打毬來
劍舞戎歌樂未休
煌煌芝火五城樓
班姬獨臥昭陽殿
却捲珠簾望女牛
十五承恩侍袞旒
宮中初拜大長秋
見說上林陪羽獵
君王同着紫雲裘
興慶池頭漏未闌
梨園弟子曲將殘
花前更進涼州伎
無那西官月色寒
馳道氍毹御柳垂
春風挾彈羽林兒
武皇親御長楊殿
敕與龍駒控鬪騎
狗監離宮承宴歡
掖庭通晚不迴鑾
那能夜夜長門裏
銀燭薰衣待漏殘

雜謠 四首

按此皆紀正德五年八月之變也

夫爲虜妻爲囚
少婦出門走道逢
爺孃不敢收
東市街西市街黃符下使
者來狗棘棘雞鳴飛上屋
風吹門前草蕭蕭

壞我民居田樹子桐與檟桐檟何青青棄車不得下
狐彭彭兔逐逐反顧舜以北轡弓來彎弓來
沼我乎遠兮築子之淒兮木檀隕落樂安歸兮

古意二首贈劉子

空爲郢中客不見郢中吟美人高堂上自奏山水音
帝子葬何處瀟湘雲正淡寂寥誰共賞江上獨傷心

楚妃一失寵獨宿楚江陰雖念容華落終憐繼絕心
聞說章臺畔敗游歡自淒今日官中事不言讒妒深

贈王洲之

洲之放游濩落廿年頃來京師將從卑宦飲以卮酒并爲歌贈之
君不見十月狂風吹白雪長安城中地欲裂朱門酒壚紅炙天
空裏瑤花旋消滅由來都國盛繁華青雲絡繹滿仙車浪說黃
金賜寒士爭言白壁謁侯家矜矜意氣遙相羨片善朝推蒙
夕薦待詔虛沉金馬門傳宣直上麒麟殿王郎濩落爾何求
千里乘驢被黑裘空論作賦稱才子未肯低眉事貴游知君
不得逢楊意終愧明時老督郵

答顧郎中華玉

昔居長安西今居長安北蓬門臥病秋潦繁十日不出生荆棘牽泥匍匐
入學宮馬瘦翻愁足無力慵疎頗被諸生譏虛名何用時人識京師賣文
賤於土饑腸不救蓋鹽食去年作吏在法曹月俸送官空署職牀頭一瓊
不滿儲囊裏無錢作沽直歸來困頓不得醉兒女荒涼婦歎息今季調官
去懊惱苦笑先生祿太嗇釜中粟少作糜薄白碗盛來映膚色丈夫但免
溝壑辱日飲藜藿勝羊肉平生富貴亦何有羸軀幸自弛耕牧但願時豐
民物安官府清廉盜賊伏人人鼓腹厭梁菽先生雖病甘首蒼一朝雷雨
濯亭衝坐見諸公執中軸先生倏然卷懷退茹齋歸向南山卜

入沛

落日徧草色遊子入沛鄉如何緬茲土能令心慨慷道逢守津吏問客來
何方一爲陳風俗三歎久徬徨前者貳尹家會客具酒漿遣吏出市物吏
私入已囊尹訊卑以紆吏言佞以張回身赴入河尹懾親扶將矯矯驚悍
氣重忿復輕亡由來英雄氣儻盪出芒碭予聽此言立側想大風章撫劍
一爲歌春宇無精光原野厲長飈飛鳥不遑翔翟翟蟋蟀歎悽惻感陶唐

彭蠡

茫茫彭蠡口隱隱鄱陽岑地涌三辰動江連九派深揚舲武昌客發興豫章吟不見垂綸叟烟波空我心

在武昌作

洞庭葉未下瀟湘秋欲生高齋今夜雨獨臥武昌城重以桑梓念凄其江漢情不知天外鴈何事樂南征

曉下廬山

下山漚鼠啼藤竹使人迷多謝東林月殷勤過虎溪

登支硎山樓遲遊侶

谷寺憐幽密茲樓表麗觀烟雲連壑動竹樹入門寒獨往迷前徑憑高遲所歡時聞有清磬遙出暮林端

長陵西望秦陵

昔送宮車出長悲西雍門今來寒食節獨望灞陵園杳杳仙城閉萋萋封樹繁當時侍從客慟哭幾人存

九日遊眺二絕句

頻季搖落寄邊州無賴今晨強出遊從教烏帽欺人髮不耐黃花亂客愁
西門沙丘頽欲崩思望芒山強自登正愁隴樹模糊甚更著浮雲蔽秦陵
浙江驛下作

自嘆南浮客崎嶇驛嶺遙川途濳斜日鉦鼓送揚橈水勢含滄海山形折
落潮夷墟不可問徒使旅心搖

送友

瓜生葛薪下綠蔓義相因人生結交故婉變自懷親交義諒不遠戚若同
株根勿采棘下瓜棘傷多苦辛不惜傷者苦但恐株荻分念當與子別惻
惻傷我神

留別邊子

我車駕言邁將子城之隅豈無他人親卷戀心自知握手一爲嘆忽忽從
此辭驅車何迢迢迢迢復遲遲匪我車輪遲行子有所思登高望河水河
水何瀾瀾寒裳欲涉之俛首以踟躕孤楊生河干嫋嫋何差差民生失儔
匹惻爾令心悲

送士選侍御

壯士樂長征，門前邊馬鳴。春風三月柳，吹暗大同城。蘆溝橋下東流水，故
人一樽情未已。胡天飛盡隴頭雲，唯見居庸暮山紫。羨君鞍馬速流星，子
亦孤帆下洞庭。塞北荆南心萬里，佩刀長揖向都亭。

送范靜之遷威州四首

吾憐范巨卿，悃悃不邀名。作吏竹林下，清風訟獄平。與君同得罪，獨竄夜
郎城。萬里巴江水，相思猿狄鳴。

聞上巴江峽，黃牛峽最遲。君聽流水意，何似隴頭悲。
爾向巫山日，瞿塘春可憐。柳絲嬌綠水，白雪媚陽天。
玉壘爲糟蘖，巴川卽酒泉。乘舟捉明月，直到女牛邊。

送耿晦之守湖州

遠下吳江向雪川，高秋風物倍澄鮮。鴛鴦菰葉翠相亂，錦石游鱗清可憐。
郵渚櫓頻津吏鼓，漁歌唱近使君船。吳興峴山足勝事，漢水襄陽空昔賢。

送蕭若愚

送君南下巴渝涘，予亦迢迢湘水心。前路不知何地別，千山萬壑暮猿吟。

青門歌送吳郎

吳郎醉嗜長安酒落魄自言爲客久走馬頻看上苑花回鞭幾折青門柳
青門曠曠魚鑰開乳燕游絲相逐來柳下雕鞍留別袂花間酒盞覆蒼苔
浮雲去去辭城闕芳草連天那可歇野店春風聽早鶯關河曉樹懸星月
千里淮流雙畫橈廣陵驛前逢暮潮落日帆歸揚子渡青山家對伯通橋
吾家流水元非隔宛轉胥臺通巷陌草長難尋仲蔚居林深不辨陶潛宅
清溪屋下可垂綸復有尊羹足獻親君歸倘食冰絲鱠爲念羈棲塞北人

贈別獻吉

爾放金雞別帝鄉何如李白在潯陽日暮經過燕趙客解裝同醉酒壚傍
徘徊桂樹涼鷗發仰視明河秋夜長此去梁園逢雨雪知予遙度赤城梁

送友人還吳

陽月隨陽鴈遙從塞上來北人江北望不見隴頭梅坐下楊朱淚吟爲莊
鳥哀聊傳數行札千里送君回

送蕭少府

矯矯雙鳧塞隴分武夷殘雪半春雲玉洞只愁仙隱去洛陽花下不逢君

送顧馬湖孔昭二首

巴東明月巴西歌兩岸梅花羌笛多一曲停橈雙淚落猿聲三峽若爲過
錦水由來勝若耶蘭橈三月汎桃花巴兒見客能歌舞蜀女明妝笑浣紗
安南歌送沈使君

借問炎交路若何片帆南指廣州過知君怕見桄榔樹近嶺猿聲日漸多
送方山人

嚴子灘頭花落時水清雲碧淨漣漪孤舟相逐飛花去一日看山到武夷
送盛斯徵赴長沙

昔愁越鷺千峰互轉入巴渝萬里賒豈料聖恩憐賈誼猶煩佐郡出長沙
蠻中瘴遠三湘水江畔春逢十月花遙聽岳陽樓上笛可能迴首憶京華
唐生將卜築桃花塢謀家無貲貽書見讓寄此解嘲

予昔攀白日虹蜺千紫庭浮沉帝座側無人知歲星側待公車無所歡聊
騎天馬出長安南下蒼江浮七澤還攜謝客弄波瀾青倪中開秀廬嶽瀑
布灑入千峰寒冥冥仙氣貫南斗直欲凌身燒大丹迴裾西拂巫山浦浩
蕩歡心間雲雨歸來欲奏楚王書漢主上林方好武黃金不遇心自吁白
璧無媒翻見侮昨日結交燕少年酣歌擊筑市中眠正逢天子失顏色奪

俸經時無酒錢入門百結鸚鵡盡笑立文君明鏡前却思舊日高陽侶黃
公酒壚何處邊天下綈袍誰不憐却卿未具山中棗何人爲買剡溪田唐
伯虎真俠客十年與爾青雲交傾心置腹無所惜擊我劔拂君纓請歌鸚
鵡篇爲奏朱絲繩胡爲擾擾蒼蠅之惡聲我今蹭蹬尚如此嗟爾悠悠世
上名

寄華玉

去歲君爲薊門客燕山雪暗秦雲白馬上相逢脫紫貂朝回沽酒城南陌
燕山此日雪雰雰祇見秦雲不見君胡天白鴈南飛盡千里相思那得聞
駕出南郊退簡邊喬二太常

齋殿鑿輿下郊官鳳野開霜戈迎日動芝蓋拂雲來輦道前旌直鈞陳翼
騎迴甘泉枚朔侍詞賦接仙才

秋日懷李郎中

秋興因高賦雄才憶省郎山川思不極雲樹莽葱蒼對酒知時變看花感
別長如何霜後鴈猶未達瀟湘

過喬侍郎省中因懷獻吉

東掖當季署長廊故柳斜久辭陳子榻重謁謝公衙廳事垂蛛網高簷噪
晚鴉風烟那可憶飄泊惜瑤華

懷往二首

昔我逢休景結交共雲翔秦客穆修矩魯生蔚令章同聲展言笑四座發
芬芳北牖湛清酒明月出西方廣署滅流塵蘭燈揚朱光極意連篇翰良
夜殊未央歡宴豐時豫千秋焉可忘流光一朝絕撫膺增慨慷
穴蟲測序改客鳥知時宴嚴風振中野凝霜薄飛觀褰裳啓東戶河星出
有燦耿耿不遑寐沉思遂回亂何以終遙夕明燈且濡翰自我違之子苑
藻絕流玩郢斤不存目流俗恥墜墜塊處空堂中誰爲發言榮感慨申微
詞佇立倚長嘆

偶述

聖人嘉禮在元年内使新從十道還欽遣鸞儀迎月姊禁中宣敷會金錢

觀田魏二廷尉射歌

魏子手挽高麗弓氣滿兩石開青虹田郎亦自號猛手談笑彎弓自裏肘
秋風繫馬古原下合耦翩翩習步射眼中何有百步的彊幹慣使千季拓

共驚二子手法利突如流星中如樹側身仰視秋雲開飛鳥顧之不敢度
壯哉二子氣如虹左揮右霍誰爭雄燕山秋高太白動寒日獵獵吹胡風
前時出軍大同壘紅纓白馬多乳子柔絲斗弩不解持吹竽之濫誠可嗤
彼乳子者何足道可惜王師直爲老吁嗟田魏二子真雄才高壇大纛何有哉

月

故園今夜月迢遞向人明只自懸清漢那知隔鳳城氣兼風露發光逼曙
身驚何事江山外能催白髮生

鳳凰山園雜詠二首

鳳鳥期不來瑤華幾銷歇唯有山中人吹簫弄明月鳳鳴亭

仙人好博奕時下綠雲中一片蒼苔石落花長自紅弈臺

沅溪潘進士在長安逆旅中見庭下山丹花詰其主云是沅中務
來感而賦詩命予嗣響

故苑花空發他鄉鶯自啼主人孤館裏斜日楚雲西

十六夜月

乍滿虧俄及綠明晦易侵不妨愁玉兔嘗恐近浮陰白露丹楓遠清光紫

聞說如何鴻鴈急數數有驚音

土城以下皇甫氏刊外集

邊風萬里來忽聚土城口土城無人行獨客倚衰柳
驚沙何冥冥古樹臨荒戍身是太平人愁見沙漠路

內中偶述

未嘗殊方貢黃旗使者回內園春未到青筍渡江來

大殯詞

陽月群陽閉玉泉六龍回馭伏虞淵蓬萊閣下千官哭一代山河十八年
平明中使忍傳來驛奠群宗大廟開金井橋邊仙輦別隆宗門外哭聲回

春思

渺渺春江空落暉行人相顧欲沾衣楚王官外千條柳不遣飛花送客歸

都少卿穆

穆字玄敬吳縣人弘治己未進士授工部都水主事歷禮部主客郎中年
五十四乞休加太僕少卿致仕又十四年而卒玄敬七歲能詩及長不習
章句泛濫羣籍挾兔園策教授濠上幾二十年吳文定公爲言之學使乃

得補博士弟子三年而舉進士為郎奉使至秦中訪問其山川靈勝古建
國形勢故宮遺壤作西使記據訪金石遺文摹榻繕寫作金薤琳琅錄歸
老之日齋居蕭然日事警討或至乏食輒笑曰天壤間當不令都生餓死
日長如也吳門有娶婦者夜大風雨滅燭徧乞火無應者雜然曰南濠都
少卿家有讀書燈在扣其門果得火其老而好學如此元敬著述甚富文
筆平行詩尤單弱不成家余聞之故老玄敬少與唐伯虎交最莫遊伯虎
鎖院得禍玄敬實發其事伯虎誓不與相見而吳中諸公皆薄之玄敬晚
季淡自悔恨其歿也不請銘于吳人而遠求胡孝思蓋亦其繼意云

次韻邊太常

淡居休嘆食無魚詩思春來說有餘苦愛弄風池畔柳纖條時拂手中書

悼張靈

寫畫哦詩意自便科場休謂子無緣高樓明月依然在靈季十四五作詩
有高樓明月清歌夜知是人生第幾迴之句余甚愛之遼鶴歸來定幾年

悼姚廣

綏屋高吟興浩然六書精究到旁偏橫門溪水流嗚咽不見當年問字船

邢處士參

參字麗文爲人沈靜有醞藉固而不陋嘉遯城市教授鄉里以著述自娛
戶無寸田未嘗干謁雖朋友之門亦不輕步屣過從昌穀希哲皆尚之早
歲喪偶不再娶客至或無茗椀薪火斷則冷食嘗遇雪累日囊無粟兀坐
如枯株諸人往視之見其無慘懔色方苦吟誦所得句自喜又連日雨復
往視屋三角墊怡然執書坐一角不糝亦累日矣其祖用理遺叱鼠賦人
謂麗文君無益益之糧正不必效乃祖作賦也昌穀爲作歌以申歡慕辭
曰雲中鶴子鳴且蜚三三五五將焉歸歸在外野獨徘徊從朝無梁暮不
炊於何求乎蘆之漪我將往饋羹中魚將子不飢兮我心愉

懷友詩

友凡九人爲吳雄次明文徵明徵仲吳奕嗣業蔡羽九達

錢同愛孔周陳淳道復湯珍子重王守履約王寵履吉作于正
德丁丑庚辰之間前後一十八首今錄二首

吳奕嗣業

共泛荒溪際匆匆兩月來薰風老首循霖雨熱楊梅髮蒼尋僧試看花許
客陪遙知明月夜獨棹酒船回

蔡羽九遠

羨子湖山勝來遊路却遙開園味芍藥入寺揆櫻桃夜月黃金縷春風碧玉簫終年勞苦想洞府隔凡器

寒食與朱堯民張夢晉郊行讀道旁遺碑感而風味

冷落郊原值禁烟紅桃一樹倩人憐行來盡拂殘碑看若箇能知後百年

贈王山人

書季身不倦行樂在田園覆宅榆桑鬱聚村宗族繁魏三風格少杜五典
型存喜不嫌余懶閒來每過門

題東禪璿公房

東城少僧寺賴此堪寄迹獨往路不迂嘗來意還適煖風逗鶯花宿雨滋
燕麥不有高閒徒憑誰話今昔

寄玄敬

函丈論文十載餘暫違接席笑慵疎要知泉石蒙題品謾遣槭封侯起居
滿座賓朋應貰酒一樓燈火想讎書新春未肯經郭郭孤負蓬門日掃除

朱處士存理

存理字性甫長洲人少學制科謝去從杜瓊先生游自少至老未嘗一日忘學居恒無他過從惟聞人有異書必從訪求以必得爲志手自繕錄前輩詩文積百餘家他所纂集若鐵網珊瑚野航漫錄經子鈎玄吳郡獻徵錄名物寓言鶴岑隨筆又數百卷旣老不厭而精力不加又坐貧無以自資其書旋亦散去每撫之歎息卒於正德間季七十矣所著野航詩集楊君謙敘之今不傳其文集手藁余得之於錢允治功甫錄其詩數章自元季迨國初博雅好古之儒總萃於中吳南園俞氏笠澤虞氏廬山陳氏書籍金石之富甲於海內景天以後俊民秀才汲古多藏繼杜東原邢彞齊之後者則性甫堯民兩朱先生其尤也其它則又有邢暈用文錢同愛孔周閻起山秀卿戴冠章甫趙同魯與哲之流皆專勤績學與沈啓南文徵仲諸公相頡頏吳中文獻於斯爲盛百年以來古學衰落而老生宿儒簡經蠹書者往往有之吳岫方山非通人也聚書逾萬卷錢穀叔寶畫史也與其子允治手鈔書至數千卷居今之世後生末學不復以讀書好古爲事喪亂以後流風遺書益蕩然矣余嘗欲取吳士自俞石礪王光菴以後網羅遺佚都爲一編而吳岫諸人亦附著焉庶幾前輩風流不泯沒於後

世且使吳人尚知有讀書種子在此也錄詩至存理俛仰感歎而附志之如此何元朗叢說云朱野航乃薊門一老儒也在荻扁王氏教書野航與主人晚酌罷主人入內適月上野航得句云萬事不如杯在手一年幾見月當頭喜極發狂大叫扣扉呼主人起詠此二句主人亦大擊節取酒更酌興盡而罷明日過請吳中善詩者賞之大爲張具徵戲樂留連數日吳中舊事其風流有致良足樂也

傲松軒避暑漫興

溪南借我雙松樹六月虛堂面水開松下清吟成漫興酒邊涼雨洗炎埃一聲老鶴月中聽萬里秋濤天外來自把殘書堪臥讀先令童子掃莓苔

松下遲楊君謙不至

二首

松下欹眠客不來乘涼起坐一銜杯書聲聒耳雜松籟白晝滿天風雨晴松下緝書坐石牀書魚睛落硯波涼須臾月出照書上歷歷蠅頭字幾行

九日

松下行行二三子書聲白晝草堂開老夫把卷仍自讀舊雨到門今不來苔石無塵碁局在沙汀有水釣船回秋風籬落偏蕭索獨嗅寒花持酒杯

宿光福寺

短策行行一里餘
松林過雨步徐徐
半泓墨沼窺遺跡
數仞龜峰望遠墟
石磴夏涼青荔合
山扉晝寂綠蕉舒
夕陽突兀浮圖影
送目長天晷晷如

朱處士凱

凱字堯民長洲人與朱性甫齊名文徵仲志存理之墓曰兩人皆不仕又不隨俗爲廛井小人之事日惟挾冊呻吟求昔人理言遺事而識之對客舉似如引繩貫珠纒纒不能休素皆高貲悉費以資其好不惜也成化弘治間其名奕奕於郡城之東人稱之曰兩朱先生正德壬申堯民死明年性甫又死自兩人死吳中故實往往無所于考而求其遺書亦無所得惜哉堯民集不傳有句曲紀游詩一卷徵仲又言吳有閭起山秀卿者家惟一僮日走從人家借書手抄口吟日夜不休所獲學俸盡費爲書資家貧不能炊質衣以食而翫其書不忍棄竟以積勞得疾歿死秀卿著述自二科志以外無傳余悲其人與兩朱先生略相類也因附著焉

題鄭所南畫蘭

者宮春令北風寒九畹蕭條入塞垣
老死靈灼在南國百季誰爲賦招魂

下小茅峰行平野約四五里入玉晨觀

先朝臺殿影重重香霧霏微散碧空金液妙存雲笈裏玉晨形在寶珠中
檜生左紐天機契龍葵前池海脉通綠髮仙翁披鹿褐一龕神氣與生同

茅山中人皆不飲泉水悉下汲於注壑又不善蓄佳茗住茲三日

清苦之味頗未沾唇既歸作三十韻以自解兼呈社中諸友

情閒好品茶性淡能辨水江左幾泓泉勺勺定媼美浙右園培栽種種別

妙理七寶白雲淳吾郡西山二水皆乳泉七寶差勝石井劔池泚虎丘二

水皆積坎石井尤勝舊稱陸羽泉品為天下第三水今為庸僧所汙濁夏

乎惠麓流名不無虛士金沙與於潛二水金沙在湖之顧渚在昔造貢茶

用之造畢水亦同貢於潛在常之陽羨實難為姊妹金沙最勝顧陽針芒

如顧渚陽羨異境同脉沈存中論茶以土肥樹皮一發而長寸許如針芒

者是為上材他山麥穎比土瘠樹老不能條暢故短如麥穎是為下材斫

射聯吉祥二焙顧渚傍產碧葉光蕤蕤唐貢接真珠二焙陽羨傍產綠叢

秀藥藥串膏浪有名申茶含膏茶唐人甚珍之此法已廢生膏久亡矣唐

貢細搗生膏茶入銀瓶中從急程遞貢當時境會亭自樂天初開貢常州

崔湖州茶山境會宴詩云青蟻逐舞俱爭妙紫笋烹嘗各開新今也生荆
杞對景訪遺蹤嶮峻屢曾履事須身所親趣在工夫裏正法陸生經傍參
諸野史竹爐與箬筐相隨無遠邇窮源汲水清篝火烹旗紫應手傾入壺
解眼若浮蟻甘腴勝醍醐芳香奪蘭芷杯面鋪白花盞底絕纖滓醉目閉
卽舒倦體臥還起詩腑常焦枯七碗猶未已同好唯兩僧合志只三子爭
新與鬪奇各盡胸中技遂結夙世緣任彼老饕嘗尋真到華陽豈以口腹
恃款食頗精豐供飲何率爾漫呼出厨間熟湯差可擬噤呷潤渴喉敢將
唇大哆吾社適聞之笑我應見齒明年再往茲畏茗置行李

劉秀才嘉綉

嘉綉字協中欽謨之子也風儀如玉年數歲據小几習書選古詩儼如成
人十五喪父盡讀其遺書嘗著弔范墓文讀者棘喙不能句季二十四而
卒所與游者祝希哲都玄敬文徵仲唐子畏子畏編其集又爲墓碣而楊
君謙爲志君謙劉之自出協中之內兄也

過吉祥寺題壁

城裏幽棲古寺閒相依半日便思還汗衣未了奔馳債便是逢僧怕問山

過吳嗣業東莊

塵容與俗情到此異平生始向亭中坐還來樹下行
小池當面淨獨鳥隔林鳴更勸君栽竹他年約聽聲

列朝詩集

丙集第九終